

IRako presoentzako amnistiarik ez dela izango iragarri du Majorrek

Negoziaketan atarian lasaitu nahi izan ditu kontserbadore eta unionistak

John Major lehen ministro britainiarrak Irlandar Armada Errepublikarreko (IRA) presoentzako ez dela amnistiarik izango iragarri du igaro asteburuan. Era horretan, unionistak (protestanteak) eta kontserbadoreak nolabait lasaitu nahi izan ditu, Ipar Irlandari buruz Londres eta Dublin egitekoak diren negoziaketan emaitza zein izango den argi ez dagoelako.

LONDRES

John Major lehen ministro britainiarrak egun esku artean duen gai nagusia Ipar Irladako etorkizun politikoa da. Hori dela eta, Londresen eta Dublinden artean egitekoak diren negoziaketan emaitza zein izango den oraingoz argi ez badago ere, Irlandar Armada Errepublikarreko (IRA) presoentzako amnistiarik ez dela izango jakinarazi du Majorrek, unionistak (protestanteak) eta kontserbadoreak lasaitu nahian. Izan ere, Behe Ganbarako bederatzi diputatu unionisten (protestante) babes garrantzitsua ez du galtzerik nahi Majorrek eta hori ez gertatzeko ahaleginean ari da.

Londres eta Dublingo Gobernuak Ipar Irlandaren etorkizunari buruzko negoziaketetan erabaki bat edo beste bat hartu, bide juridialak konponbidean jarri ez dituen IRAren hilketei buruzko



Negoziaketetan Dublin lekuz kanpo dagoela esan du Ian Paisleyk.

ikerketak ez direla etengo adierazi zuen atzo John Majorrek. Horrez gainera, Ipar Irlandari buruzko edozein erabakiren gaineko unionisten iritzia eta beto eskubidea kontuan hartuko duela esan du behin eta berriro Londresko Gobernuak azkenaldi honetan.

UNIONISTA BURUEN SALAKETAK Londresko Gobernuak Dublingo Gobernuarekin Ipar Irlandari buruzko negoziaketak era «estuan» egiteko asmoa zuela adierazi zuen eta James Molineaux Alderdi Unionistako buruak, bestalde, salatu egin zituen aipatu negoziaketa lanetan

ariko diren zenbait diplomatiko, «herritarren bake desioa modu lotsagarri batean apurtuko dute» adieraziz.

Ian Paisley Alderdi Unionista Demokratikoko kideak, oster, negoziaketa horietan Dublin lekuz kanpo dagoela esan ondoren, Sinn Feinekin (IRAren adar politikoa) elkarrizketa bat egiteko aukera guztiak baztertzen dituela azpimarratu zuen.

Bestalde, Sinn Feineko lehendakariordea den Martin McGuinness John Major lehen ministro britainiarra salatu zuen, «bakeari lepoa emateagatik», hau da, aipatu alderdiaren, sozialdemokraten eta John Hume Alderdi Laboristaren artean garatutako iniziatiba onartzeari uko egiteagatik.

Sozialdemokraten eta Ipar Irlandako laboristen buruzagitza-aren arabera, komunitate katolikoak eta protestanteak badakite egungo egoerak bake biderako aukera zabal lezakeela. Ildo horri helduta, Seamus Mellon Ipar Irlandako laboristen 'bigarrenak' adierazi zuepe, bakea ahalbideratuko lukeen oinarri orekatu bat osatzeko Dublinek eta Londresek erabaki azkarra hartzeko garrantzia azpimarratu zuen.

John Major lehen ministro britainiarrak eta Albert Reynolds lehen ministro irlandarrak datoren abenduaren hasieran Dublinden egingo duten 'gailurrean', Ipar Irlandari buruz aurrera begira egitekoak diren negoziaketan printzipioak zehaztea dute helburu.

Amanek ez du alde bakarreko akordiorik sinatuko Israelekin

AMAN

Siriak eta Jordaniak Israelekin alde bakarreko akordiorik ez sinatzea erabaki dute, eta bakeak orokorra eta Nazio Batuen ebazpenetan oinarritutakoa izan behar duela berretsi dute. Halaxe jakinarazi zuen herenegun gauean Abdul Salam Mayali Jordaniako lehen ministroak Hussein erregearen eta Siriako Hafez Assad lehendakariaren arteko bileraren berri ematean.

Hussein Jordaniako erregea Dennis Ross estatubatuarra Ekialde Erdira iritsi baino 24 ordu lehenago izan zen Sirian, ordezkaritza diplomatiko batek lagunduta. Hala ere, bi buruzagiak bakarka ere bildu ziren. «Biek auzi arabiarrez aritu ziren, Ekialde Erdiaz eta nazioartez, eta zehazki bake prozesuaz» adierazi zuen Mayalik.

«Bi herrialdeek bake prozesuari buruz jarrerak eta irizpideak bateratzeko beharra azpimarratu dute, eta herrialde arabiarrek NBERen ebazpenetan onarritutako bake zuzen eta orokorra lortzeko modu bateratuan aritu behar dutela iritziz diote, haxe baita arabiarren eskubideak, baita palestinarren autodeterminazio eskubidea ere, lortzeko modu bakarra», gaineratu zuen Jordaniako lehen ministroak.

Amaneko iturri diplomatikoek zehaztu dutenez, ezin herrialde arabiarrek Tel Aviveko Gobernuarekin bake akordiorik ez duela sinatuko ziurtatu nahi dute Siriak eta Jordaniak. «Bidaia honen xedea bietariko batek akordioa sina dezakeela eta sortutako izuak baztertzea zen», zehaztu dute Jordaniako Gobernuaren gertuko politikariek.

Militar palestinarrek Gazako posizioak ikuskatu dituzte

JERUSALEM

Palestinaren Askapenerako Erakundeko (PAE) goi ofizialek eta militarrek Gazara egin zuten bisita atzo, etorkizuneko Polizia palestinarri buruzko xehetasunak zuzenean aztertzeko. Abdulla Fara eta Abdu Razeq Majaida jeneralak eta Ziad Arif koronela 1967ko Sei Eguneko Gerraren ostean lehen aldiz itzuli ziren atzo jaioterrira, Egiptoko erbestetik bueltan.

Israelgo Armada Gazako asentamendu gehienak biltzen dituen gunera erretiratzeko hasiko da aurki eta hustutako base eta instalakuntzak etorkizuneko Polizia palestinarri utziko dizkio, atzo 'Jediot Ajronot' egunkariak jakinarazi zuenez. Hain zuzen, «Polizia palestinarrek beteko dituen posizioak eta Israelgo Armadak izango di-

tuenak» aztertzea izan zuten helburu militar palestinarrek.

Israelgo Armadak abenduaren 13an hasi beharko luke Lurralde Okupatuetatik erretiratzeko, horixe baita autogobernu palestinarra abian jartzeko hitzartutako data. Hala ere, Gaza-Jeriko akordioa indarrean jartzeko epeak eztabaida gogorra sortu du azken aste hauetan Tel Aviveko Gobernuaren barnean: Simon Peres Atzerri ministroaren arabera, agindutakoa bete egin behar da, nola hala. Yitzhak Rabin lehen ministroaren arabera ordea, lehendabizi Lurralde Okupatueta Israeldarren segurtasuna ziurtatu behar da. «Hitzartutako epeak betearazteko ahalegin guztiak egingo ditugu, baina ez da ezer indarrean jarriko, harik eta segurtasun gaieki buruzko akordiorik lortzen ez den bitartean».

LABURREAN

JOHANNESBURGEN 27 lagun hil dira igaro asteburuan

Johannesburgeko ekialdean biolentzia giroa ez da eten. Joan den asteburuan hogeita zazpi lagun hil dira, bertako Poliziak jakinarazi duenez. Janine Smith Poliziako bozeramailearen esanetan, Katlehong eta Tokozaan hamabost gorpu aurkitu zituzten larunbatean eta beste hamabi igandean.

NIKARAGUAKO erreforma konstituzionalean aurrerapausoak

Nikaraguako Oposizioko Batasun Nazionalak eta Fronte Sandinistak Konstituzioaren erreforma orokorretan aurrerapausoak eman omen dituzte, baina oraingoz, ez azaroaren 30ean negoziazio hauek amaitzeko behar den adina. Negoziaketak egiteko jarritako epean oinarritzko erreformak egingo ez balira, oposizioko aliantza osatzen duten hamar alderdiek Batzar Konstituziogilea osatzea exigituko lukete.

ZEMIN eta Fidel Castro bildu ziren atzo

Jiang Zemin Txinako lehendakaria La Habanako aireportura ailegatu zen herenegun eta atzo Fidel Castro Kubako buruarekin bildu zen, herrialde bien arteko harremanei buruz hitz egiteko asmoz. Besteak beste, ekonomiaren gainean herrialde bakoitzak dituen esperientziak elkar trukatzeko nahi dituzte, La Habanako diplomatikoek adierazitakoaren arabera.

JORDANIA eta Errusia elkarlanean

Hussein II Jordaniako erregea Vladimir Txumeiko Errusiako lehen ministroarekin bildu zen igaro larunbatean Jordaniako hiriburuan, Amanen. Herrialde bien arteko harreman ekonomiko eta komertziala bultzatzeko asmoz antolatuta zuten jordaniarren eta errusiarren arteko konferentzia, eta ahelburu horrekin aritu ziren eztabaidan.